

南京愚园文献十一种

下册

(清) 胡恩燮 (民国) 胡光国 等撰
南京市地方志编纂委员会办公室 编

南京
稀见文献
丛刊

Nanjing
Rare Literature
Series

出版传媒集团
京出版社

南京稀见文献丛刊

白下愚园续集(补)

(清) 潘宗鼎等 撰
(民国) 胡光国 辑

江庆柏
整理 周忠
李菁

南京出版传媒集团
南京出版社

启

盖闻国家首重报功,祀典垂于令甲;里社情殷崇德,乐歌溯厥诞辰。所以于越酬勋,处处金镛少伯;邯郸论绩,家家丝绣平原。推之一树梅花,图放翁于团扇;千秋俎豆,铸岛佛以精金。从未有文起五代之衰,诗孕三唐之盛,服忠思孝,蒙难艰贞,离合悲欢,陈诸雅什,嬉笑怒骂,发为高文。声澈石钟,金以坡仙相器;禅参玉版,合与弥勒同龕。如北宋苏文忠公者,洵足寿已。公钟锦江之秀,秉奎宿之精,腹有三壬,胸罗二酉。味《辨奸论》而父书克守,读《范滂传》而母教堪钦。尘谪骑龙,早岁吐峨眉之瑞;命居磨蝎,暮年署儋耳之民。咏桧狱成,饮茶诗妙;赋题赤壁,政著黄州。与颍滨气协埙篪,偕山谷欢联缟纈。缠绵西泠,鸳柳群瞻。西蜀文星跌宕,东道莺花艳说。东坡生日,维嘉年辛丑之月,实景祐丙子之年。日曜有灵,亥逢癸日;时宜不合,乙遇卯时。一官归去来,前身陶彭泽;三绝诗书画,并肩王辋川。笔健凌云,才横似海。视香山著歌谣、敦风俗,直可颉颃;比庐陵畜道德、能文章,允堪伯仲。上溯景祐丙子,距今已八百八十八年,若论太岁癸亥在昔,才四纪四十八载。光国情殷追庆,念切隆禋。读先子之遗书,考愚园之初集。彼则均皆奉若,此则独付阙如。缘事愆期,不无遗憾,因心作则,也应补行。聚五百里高贤十八人,数符唐学士登瀛洲,遥推冯蒿叟为祭酒。逢十二月中旬十九日,礼合汉名流祭杨震,

共祝苏玉局之生辰。安排铁板铜琶,唱大江东去;预备诗牌酒盏,待明月西来。忆昔年啖荔诗成,视官黄、官杭如一官传舍;喜今日拜苏会启,继寿白、寿欧而三寿作朋。特写芜词,恭迎芝盖。繫驹空谷,幸毋金玉尔音;吐凤才人,当有琬琰之集。欲竟先人未竟之绪,是所望于群公;藉尽后贤宜尽之心,或无讥于大雅。

白下愚园灌叟胡光国谨启。

记

潘宗鼎

愚园灌叟,吾乡耆宿,当代灵光,管领园林,主持坛坫。修髯如画,是端明学士之俦;仙骨其珊,亦嘉祐奇才之目。年齐大耋,遥缔古欢,名父述其流风,作人彰其寿考。尊甫煦斋达^①生,尝作寿白、寿欧会。沧桑影逝,唤醒春梦之婆;水竹身闲,高揖雪堂之客。岁十二月十有九日,为苏文忠公诞降之辰,爰集名园,特开寿域。陈爵北向,奏鹤南飞。九华壶中,安孺之茶初酺;三蕉盏右,坡公云:饮三蕉叶即醉。元修之菜自腴。言献花猪,载尝竹笋。既安排乎书社,亦拂拭乎诗龕。白髯红带之吟,许招山谷;舞扇歌衫之乐,只倩朝云。石玩仇池,则枕榔曳杖;槃开银篆,而薝卜寻香。听残铁板铜琶,犹胜人间之曲;占尽琼楼玉宇,恍疑天上之游。由今计之,自有宋景祐丙子以来,又历八百八十有八载矣。噫嘻!投老粤蛮,眼底

① “达”:当作“先”。

曾无余子;命官磨蝎,身后乃有千秋。匪惟笠屐传图,模范乎山水;抑且奎垣应宿,辉丽乎星辰。公诗有曰:“四海知我霜鬓须。”又曰:“醉中不觉到江南。”亶其然乎。宗鼎七千里外,十八滩头,曾印雪泥,亲摹石像。坡公与阳玉岩石像在赣州夜话亭中。曩年屡获拜观,并拓石本,曾留游记。聚观香案之吏,夙证良因;曩客虔州,为坡公度岭之处,见于公集。来参玉版之师,又逢盛会。簪梅花而狂笑,葆松柏于岁寒。醉把羽觞,暖送金陵之酒;模吹腰笛,神游赤壁之天。尽教后约还来,不知老至;但有先生在上,何以文为。

文

姚椿寿

人生于荣辱利钝之遭,虽曰天命,要因于有才以召之也。人苟不才也,巍然视听食息,混据于大块之中,没世无称,宜也。抑或才等于庸众,而所据之时势,王灵不振,豪杰奋兴,乃投袂而起,取将相如反掌,非不荣且利也。再传而后,鲜有知其当日赫赫然昭人耳目者。又若才足以旋乾转坤,震惊乎一世,而中间忽荣而辱,忽利而钝,无端贾祸,谴谪频来,幸而收桑榆之晚景,功成名遂,归老林泉,其轶事间有可传于异世者,而未必能使后之人景仰思慕而不忘也。噫嘻!如东坡者,世凡数易,民到于今称之,岂非其才足以横绝古今乎?夫其为文也,如长江大河,浩无涯际,无俟赘论已。其为人也,倜傥不群,不沾沾于小节细行。于是忌之者、妒之者日益众,党派各异,寻隙抵排,时而罪迁,时而远

谪。迁之谪之，而名不稍杀，特不料洋溢乎天下于数百年之后耳。公之生距今八百八十余年矣，今者灌叟开寿苏会，招集同社。吾知灌叟之名，必与东坡并传不朽，倍于其年之久，未可知也。在东坡当日，岂预知有今日之会哉？或曰东坡神仙中人也。灌叟年臻耄耋，著作宏富，精气内含，亦为神仙中人也。若纯阳，若钟离，世有见其形相者乎？曰无有也。神仙留名于人间而已。今日之会相传或数十年，或数百年，后之人亦应疑为神仙中人也。东坡有知，当以鄙言为近似也。以祝东坡，以祝灌叟，并今日与会之诸君子。

祝 文

魏业镇

繫公钟眉山之秀兮，炳奎宿于窈冥。秉乾坤之正气兮，下河岳而上日。星辰岐嶷兮，麻鞋见天子。幼徇齐兮，巢几识风丁。品节兮岳峙，才思兮渊渟。文浩瀚兮似海，诗迅疾兮如霆。奎森严兮无敌，笔奔纵兮不停。继明允兮名世，偕颖滨兮趋庭。歌风兮陟岫，喜雨兮名亭。前后游兮《赤壁赋》，左右望兮《黄楼铭》。读父书兮千秋轨范，遵母训兮百世仪刑。啖荔兮闻名中禁，咏桧兮对簿大廷。视陶彭泽、韦苏州兮曰前身矩度，奉陆宣公、韩昌黎兮曰先正典型。友黄山谷、秦淮海兮如身使臂，交苏子美、梅圣俞兮若影随形。才高倚马兮忠贞常矢，命居磨蝎兮忧患饱经。治杭郡兮与香山相伯仲，官翰苑兮受庐陵之磨礪。岁丙子兮岳降，月辛丑兮曜灵。日癸亥兮天朗，时乙卯兮雨零。叹时宜之不合兮，人醉

而我醒；纵身屯夫阳九兮，丹心照汗青。与洛朔而分党派兮，上封事而动天听。珍翰墨兮鸡林贾，写歌词兮猩色屏。山门兮留带，禅榻兮挈瓶。称仙兮梅花放，宣佛兮贝叶肩。距今已八百八十八载兮，继寿白寿欧而祝遐龄。公来格兮，享我醪醕，公来歆兮，饫我笾簋。我歌寿人曲兮，公其来聆。公其不我遐弃兮，黍稷维馨。

魏业镇

癸亥季冬，江宁胡碧澍姻丈以秣陵之胜境，为苏公所旧游，招集名流，成兹雅会。值东坡生日，拜西蜀文星。寿苏继寿白、寿欧，隆愚园之盛典；官杭复官黄、官汝，过钟阜作寄公。业镇当陈觞祝嘏之时，乃援笔为文以祭曰：惟公著旋乾转坤之绩，泽被九州；垂经天纬地之文，师表百世。鹤南飞而风云起，鹏北徙而日月光。人间岁星，天上奎宿。慕香山故迹，雅号特崇；受庐陵新知，盛名斯副。伊可怀也，亶其然乎。乃当是时，祖制纷更，朝多朋党。边衅轻启，民困兵戎。内有惇布朋比之奸，外尽辽夏方张之寇。公虽策陈三事，书上万言，而案起乌台，诏颁凤阙。其何以经营宇宙，弹压山河者哉！迹其初终，有可述者八焉。公幼本聪颖，金曰圣童，长更徇齐，便称裁伯。权书衡论，乃志林之师承；铸史镕经，悉老泉之宗派。披范滂传，母教堪钦；进仁宗言，父书克读。课士而学宗尊孟，观人则论本辨奸。舟中而听弹琴，海外而喜评奕。其志继有如是者，可述一也。公手如天马，心有灵犀，与介弟同掇巍科，偕弱妹相联雅咏。东轩竞爽，玉笋班联；西掖齐镳，金莲烛撤。弟昆双学士，传佳话于眉山；

兄妹三词人，斗巧思于心境。兰妆莲步，逞雅谑于香阁画堂；苔发花须，寄清吟于雕栏曲院。其和乐有如是者，可述二也。公腹有三壬，文笔挟韩潮而至；胸罗二酉，词藻孕陆海之全。策对阙廷，仁庙许为相略；书陈殿陛，神宗赞曰奇才。刷字摹李北海之碑，耽吟入米南宫之梦。忆咏雪聚星堂上，前身陶彭泽，后身韦苏州；记扶风喜雨亭中，文心韩昌黎，诗心李太白。才宏似海，胆大于天。其博瞻有如是者，可述三也。公命官磨蝎，身世蛰龙。咏桧狱成，王珪拾舒亶之唾；宣麻诏出，张璪袭贾易之词。饮弹章而抗论青苗，忌直言而挂名白简。丹心谋国，赤舌烧城。纵王安国力辨其诬，而吕惠卿隐肆其僭。惶恐滩谪官舟覆，云岂悼危；端礼门党人碑成，悉由京置。其落宕有如是者，可述四也。公犯颜敢谏，折槛风高，正色匡扶，登廷霞举。慷慨正朝端阙失，从容进当宁箴规。曹太后、高太后述先帝之言，韩国公、蜀国公论人材之荐。代张方平论兵事，与王安石说民艰。色庄如伊川，而以不尽人情讪；忠贞如涑水，而以请行差役争。其戆直有如是者，可述五也。公为民请命，毗陵特免差徭；济众恤灾，彭城频宽赋税。葑湖晓色，杨柳春堤；竹院曙光，榆槐夏屋。弄赤壁风月之笛，李委著紫裘而来；绘黄楼烟雨之图，王巩携青衣而至。治惠郡则情殷保赤，官儋州而念切抚黎。颂遍茅檐，泽流蔀屋。三言戒定慧，佥称生佛于万家；一官归去来，群说游仙于陆地。其恺悌有如是者，可述六也。公砚磨龙尾，笔试鼠须。或携药炉经卷以供朝云，或凭斗酒诗篇而邀夜月，或咏湖苹而规琴操，或赋海棠而醒李宜。诗写参

寥，泉清入梦；龕同弥勒，庵静证禅。安排铁板铜琶，唱大江东去；留镇金山玉带，喜法雨西来。仙逋放鹤以嬉，佛印烧猪而待。漏湖焚买山之券，清泉作调水之符。甘露寺弹箏，箏箏写意；冷泉亭判事，事事关心。有酒学仙，无酒学佛。柔日读史，刚日读经。徘徊水月庵前，问文长老色即是空，空即是色；俯仰乾坤图里，评王摩诘诗中有画，画中有诗。其旷远有如是者，可述七也。公好贤若渴，从善如登。范祖禹论新法病民，署名以进；毕仲游戒直言贾祸，降心相从。褒鲜于侁以三难，嘉晁无咎以七述。制序美朱康叔之孝，撰碑表吴越王之忠。泛爱而一技之能，刍菟必采；周咨而四方之士，连袂来归。送吕希道知和州诗，便推奇表；见徐大正赋钓台什，遂定神交。拔王当于贤良，荐张举曰高行。张文潜缔交淮海，王子立梦婿密州。入黎子云座以衔觞，观晁说之文而阁笔。其谦抑有如是者，可述八也。抑更有进者，门有通德，家承赐书。世业文章，父垂嘉祐之集；堂标圣善，母膺成国之封。偕东轩同举制科，昆弟并官翰林学士；蒙北阙累加拔擢，祖孙皆仕礼部尚书。伯达绰有父风，叔党原多士行。书称跨灶，集号斜川。迈迨过梓舍联芳，迟迨远竹林结契。令子则数符薛凤，珠树腾辉；文孙则算倍崔龙，琼枝吐秀。国恩浩荡，家庆绵延。斯固门祚之丰隆，抑亦世承之鼎贵已。今者情殷算亥，颂起林壬。悬弧溯景祐之年，捧觞启嘉平之宴。忆昔年效黄州故事，曾庆初度于西泠；喜此日聚白门新欢，齐拜朗躔于南极。在胡公永绥眉寿，修上宾介宾之仪，而业镇宜蕙心香，奏迎神送神之曲。其辞曰：

神之来兮驾青螭，神之格兮拂云旗。回日驭兮振天维，
红牙按兮白羽麾。停云望兮落月思，诗筒递兮酒榼随。鸛
鷖杓兮鸛鷖卮，鸡头鶮兮牛尾狸。昭来许兮鉴在兹，武功定
兮文教熙。我歌迎神一曲兮，具槃匱。

神之去兮旌旆扬，神之佑兮达天阊。千秋鉴兮万年觞，
上池水兮帝台浆。甘露沛兮庆云翔，挥鹅管兮奏莺簧。迎
风观兮却月廊，书露版兮奏霓裳。星得岁兮日当阳，期仙磴
兮选佛场。我歌送神一曲兮，夜来^①央。

谢慕懿

繫惟眉山，诞降大苏。奎垣应宿，笠屐传图。幼承母教，
长读父书。黄楼纪绩，赤壁留趺。筑堂东坡，障堤西湖。应
试礼部，为庐陵徒。出知杭州，与香山俱。昔寿欧白，公独
阙如。今兹补作，公其许乎？何以荐公，状似松鲈。何以享
公，味美花猪。黄蕉丹荔，为公馐余。铜琶铁板，为公欢呼。
云车风马，公其来诸。尚飨！

① “来”：当作“未”。

卷 一

用聚星堂韵

冯 煦

海上讎书扫残叶，冬燠如春不一雪。嘉平十九东坡生，愚园嘉会信殊绝。我衰蛰伏不敢往，碧叟征诗简屡折。往者辇下适此日，斗室清尊尘虑灭。笠屐图陈罗众宾，回首卅年惊电掣。供职西清，屡有此会。而今铜狄委荆榛，寸寸牢愁上眉缬。叟也好诗与坡同，餐菊抚松日栖屑。啸歌且学愚公愚，钟鼎山林供一瞥。愿叟更奏鹤南飞，鹤归共证尧年说。我亦肮脏乖时宜，剩有刚肠如屈铁。

沈瑞麟

愚园盛会值良时，千里逢迎毂击驰。寿白寿欧征往迹，寿苏继作允相宜。忆昔五代经扰乱，文学不讲日陵迟。对偶声律相矜炫，起衰振弱畴能为。岳岳梁岷钟秀气，笃生异士擅英奇。文才卓越本天成，雄浑直继韩昌黎。行云流水无定质，走笔即成绝妙词。诗赋书画尤精绝，凡庸那得与等期。奇篇雅什世争传，焕炳百代光陆离。山谷淮海虽工敏，阳乌垂曜晨星微。爱君忧国心耿耿，器识何愧皋与夔。秉节不阿愠群小，媒蘖摭拾相排挤。一官漂泊无定迹，暮年窜逐尹蛮夷。抚育黎元存惠爱，生祠斯建民感怀。硕德英才足钦仰，

赫赫高名万古垂。中旬恰值嘉平月，溯厥诞辰实在兹。愚园灌叟饶佳兴，情殷迫庆集亲知。筵席肆设樽壘陈，瑶浆馨洁羞琼糜。衣冠整饬同膜拜，竽瑟杂会间埙篪。宾朋济济相酬酢，缓带乐饮饫甘肥。帘外寒梅争破蕊，漫天瑞雪倏纷飞。盎然春意满庭除，对此兢覆手中卮。燔炙芬芳春酒暖，一觴一咏尽欢怡。诸公才华过屈宋，新诗瑰丽灿珠玑。鰕生惭愧独不文，欣逢雅集勉追随。芜辞剪陋不足览，敢祈为我删削之。

黄凤岐

钟阜灵钟八十翁，弧辰特祀苏文忠。大树登坛为祭酒，高冈作赋联群公。香案玉堂迎玉局，金陵美酒金莲烛。笙歌拥出紫髯来，应乐此间不思蜀。以今西蜀如吾湘，俎豆没入干戈场。半壁东南兹土净，渭渔住浦经三霜。极目长江二千里，中有坡仙故乡水。灌叟因流溯老泉，隆裡善继尊君子。白门雪映峨眉皓，好鸟应言佛现了。拈花一笑满园春，眉山合寿香山老。

魏家骅

大江东下日夜声喧豗，源自东坡笔底来。淘尽三国六朝恨，铜琶铁板高唱推奇才。至今八百八十有八载，风流人物依然在。上为奎宿应文昌，下媲韩潮号苏海。潮州故有昌黎庙，民颂精诚驱鳄暴。大书石上笔淋漓，乘龙白云神感召。今谁祀公如韩文，吾乡毫耄胡隐君。隐君名园张盛会，欣欣草木齐蒿焄。寿白寿欧两世相先后，香山庐陵三寿作朋旧。园中怀白有高楼，更邀青莲学士酌大斗。词坛祭酒推吾师，

冯蒿庵师。四十年前一回首。岁寒无改松柏姿，盛世衣冠复何有。隐君虔拜眉山叟，眉山福君介眉寿。钟山之英草堂灵，岁岁今朝来饮酒。

王孝烽

昔日愚园两寿白，又有寿欧诗盈册。光绪己卯、庚辰，煦斋太守集温明叔宫保等，寿白香山二次，又寿欧阳文忠一次，皆有诗卷。其时风月乐平章，主人年少翩裙屐。回首前尘五十年，园林如旧沧桑剧。主人耄齿皓须眉，灌园余兴犹夷怿。今岁甲子尽下元，东坡生日宴琼席。欧白两寿名胜时，就中犹有蒿庵遗。昔称副车今开府，鹤发童颜寿期颐。《寿白诗存》金坛冯蒿庵中丞作序。其时中丞已中乙亥恩科副贡，年三十七，今寿已八十有一。主人安车迎之来，寿苏当然祭酒推。今年寿苏，中丞主祭。蒿老手持竹如意，仿佛皋羽下西台。忆溯元丰七年秋，居士来访半山隈。荆公劝买数亩宅，好径宜为三益开。一日又偕王胜老，蒋山游屐共徘徊。东坡次韵王荆公诗，偕王胜之游蒋山诗，皆见原集。金陵旧为髯游地，江远峰多诗情寄。荆公极赏坡公游蒋山诗“峰多巧障日，江远欲浮天。”以为佳绝无比。于今甲子十四周，八百四十年前事。天下游踪公最多，吾郡公来雅堪记。香山寿高洛社中，庐陵亦曾号醉翁。欲往从之公所愿，三寿作朋将毋同。蒿老掀髯为长啸，此乐居然备我躬。举手引杯酌灌叟，郑重主人笑满容。饮酒莫忘汉时腊，种松莫被秦代封。天地已闭贤将隐，文章尔雅独吾宗。用东坡诗句。东坡先生接笑吻，自叹磨蝎缠宫窘。丙子吾降世逢盛，《年谱》：东坡以丙子年生。实命不犹文徒敏。一自参出人世禅，人世生日作年年。借我为名酤我饮，老饕醉后不名钱。烂嚼我肉犹未餍，

风卷残云据几筵。得意挥豪诗成便，腐墨无色和馋涎。尔时先生频首颌，不知谁何略周旋。为谢主人与祭酒，愿续苏斋佳话传。翁覃溪学士得宋版《施注苏诗》，矜贵异常，因筑“苏斋”，祀东坡象，每年集都下名流寿苏。积二十年，成诗卷题跋二厚册，订附苏诗后，海内名重。

吴鸣麒

南天奎宿耿作芒，星彩下烛春晖堂。今日何日欢呼集，寿苏髯俊纷青苍。城西林园称大好，诗社煦叟能主张。年年东坡作生日，冯蒿庵陈可园前辈秦南冈伯虞。俯仰往事忽陈迹，生死难说齐彭殇。灌园老人嗣遗响，胜流仍召开壶觞。纪年八百八十八岁，景祐旦暮遥相望。命宫嗟公坐磨蝎，无端诗案贬炎荒。一场富贵醒春梦，将毋谤忌由文章。生前大集竟流布，名山争寿谁能藏。王侯生诞耀庆节，去无称述都遗忘。公乃笠屐供描画，悬像长薰人间香。青巾曲奏石壁赤，丹荔配荐山谷黄。令人钦慕一至此，但有坛坫无沧桑。煌煌庚子记圣诞，拜经荣绪闻孤臧。鸣麒每朔望必谒圣庙拈香，惜少同志。我愿同人洁筵豆，义取春秋挽澜狂。余事及公续风雅，排除佗俗趋康庄。猛忆蒿师岿然健，冯蒿师现居沪上。明朝海上瞻灵光。

刘文煜

太岁在亥月在丑，甲申朔后日十九。金陵愚园华筵开，裙屐踟蹰会胜友。堂下弄笙簧，堂上陈樽卣。荐鱼状比松江鲈，酌蚁香逾谋妇酒。参以玉版禅，佐以初春韭。醉余高唱大江东，铁板铜琶声彻牖。高处琼楼玉宇清，更欣明月中天有。此会不寻常，曰为髯苏寿。宾从如云主者谁？今之坡仙灌园叟。灌叟风流世所师，诗稿流传不胫走。我更服叟事功

多,经营乃出髯苏右。芒芒禹迹画徐州,大利所丛罕有偶。铁冶三十六,嘉谟告明后。叟乃踵苏功,总持纲与纽。遂令地宝无私藏,商通工惠民财阜。髯苏而后泽孔长,一时歌颂遍蒙眛。以叟与苏衡,德齐且地丑。遥遥八百八十有八年,两贤固宜契先后。我更谓叟天所钟,涉境视苏尤特厚。苏之雪堂晚始成,谪黄小居仍不久。叟则花盞名园擅胜区,山林清福容消受。问彼磨蝎人,曾享此乐否?苏又仕密仕杭,移黄移汝移昌化,忧谗畏讥身丛咎。叟则壮年试一官,十载淮南颂贤守。老去幡然致仕归,捐弃浮名如敝笥。兴动张翰莼,宅学陶潜柳。春梦一场醒,规不待饕妇。苏倘闻叟遭,应徒呼负负。今年叟招我寿苏,随叟跻堂献大斗。明年逢叟八十春,当更造叟祈黄耆。青巾紫绮裘,腰笛师李某。新曲敬奏鹤南飞,博叟掀髯笑开口。

顾孝珣

文人声气今古联,天留遗老持其权。灌叟八十享大年,寿苏愚园集群仙。饶林下风超平泉,时无治乱斯文终不朽,非执牛耳畴今珠玉罗当前。乃者运际阳九厄,猩猩鹦鹉彪駉以骈阗。五典攸,戮罗裂,问今何世却曲歌独弦。诚行城炷淆轨物,邪说殫殚非圣贤。屠沽狙佞继武拥旄钺,岂第人奴将相纷腾翩,吾道龙蛇乾坤莽荆棘。躬丁疵,国殆甚,髯苏目睹民困青苗钱。天特永锡难老以为灌叟寿,俾持风流文采照耀吴蜀相后先。我知髯苏浩气所充塞,会看郁作云雷下与斯世重光宣。殄灭妖孽,天心当复见。作斗牛芒,长使韵事千秋传。杖朝更祝灌叟春开宴,寿人寿世文字缘。

沈启运

泛舟秦淮拟赤壁，七月既望昨壬戌。去岁壬戌之秋，七月既望，社友仿东坡之游，泛舟秦淮，觴咏为乐。癸亥今又腊鼓闻，愚园灌叟起諏吉。安排文酒寿坡公，即兹腊月十九日。手挥露布说本原，淋漓濡染如椽笔。追怀先志读遗书，先志未酬常若失。雅人深致孝子思，愿补阙典事乃毕。自古达孝道无他，要在善继与善述。主爵遥推冯蒿叟，余曰疏附曰先后。群贤戾止祝前贤，以介以祈以大斗。洋洋如在上左右，瓣香同爇齐拜手。渊源家学仰眉山，勋业文章自不朽。生而为英没为灵，在地河岳兮在天日星。公已去今八百数十载，流风余韵德犹馨。嘉言懿行不复赘，读宋史者自可想见其典型。不然人非金石质，藐尔微躯岂易享百龄。独有令名能不坠，昭垂宇宙光荧荧。吁嗟乎！今世纷纷开寿域，举国若狂真大惑。炊金爨玉兢豪奢，赠句征文侈藻饰。浮夸相尚习成风，曷弗节俭留余德。万方多难四海穷，米珠薪桂时艰极。奈何踵事徒增华，暴殄不知爱物力。灌叟静观多感触，默念惜福宜知足。明岁春正大蓂辰，年高德劭性弥笃。不为自寿转寿苏，尊贤乐道先寡欲。即此继述孝无亏，砥柱横流箴末俗。寿白寿欧并峙三，三寿作朋载赓续。安得紫裘腰笛客，重来为奏鹤南飞一曲。

朱文鳌

癸丑嘉平十九日，云是坡仙生逢吉。灌叟雅谊崇昔贤，开筵介寿礼毋缺。清酒设盈樽异花，罗满室心香一瓣。宝鼎温华烛，双行银案列。银案列，肴丰洁，水陆兼陈桃实结。

问谁高唱大江东，手按铜琶板敲铁。招邀学士来瀛洲，杖履次第排云出。领袖群推冯蒿叟，龙马精神花生笔。寿欧寿白陈例循，何如寿苏情意切。一时珠玉喜争投，祝寿鸿文汇成帙。佳句锦囊不胜收，或韩或苏体各别。愚园自昔雅事多，愚园之主人中杰。管领骚坛春复秋，叉手诗成无定律。寿星会启集耆英，皆寿者相性和悦。今为坡公治寿筵，追维往事叹奇绝。嬉笑怒骂皆文章，忠孝尤能敦气节。艰贞蒙难著清操，锦绣诗编乃余烈。公去距今九百年，硕德高风古罕匹。如公名自寿千秋，奚俟后人更饶舌。我欲借花献佛前，转为主人称觞庆耄耄。

亢惟恭

灌叟先生年八旬，风雅后裔见替人。太翁当日耆英会，寿白寿欧新韵新。愚园初集载一一，独少东坡作生日。欲竞先人未竞绪，客约登瀛兴飞逸。会中十有八人。遥推河间为祭酒，冯蒿叟。驥尾龙头记得否？蒿老寿白诗中题名居后。寿星文星聚一时，肃治几筵酌大斗。维公景祐三年生，十月九日月嘉平。腹有三壬胸二酉，锦江毓秀奎宿精。自叹人生穷丙子，磨蝎命宫贬僭耳。文章气节耿不磨，遗像奕奕深仰止。蒿生岳降想英灵，春晖堂上祝升恒。园中堂额。大江东去南飞鹤，歌词侑酒神式凭。香山庐陵堪伯仲，佳话添作三寿朋。

徐藻

景祐三年岁丙子，嘉平十九歌麟趾。而翁命名有深心，车无饰兮不完美。少年科第似探囊，腹抱奇才宜辅弼。因谏新法判杭州，筑就湖堤守高密。曹村河决调知徐，试看熙宁